

PABORO ISANGUENAQUINERI COROSASATI

Paboro ibetsataigari Corosasati.

1 ¹¿Aintajeguibí, Corosasati?
Nasanguenataiguimini naro Paboro.
Naro iragátane Jesoquirisito,
naquenguitsatocotirini. Iroro icocaquina
Tosorintsi. Nacaraqueri yaca ira
Timoteo opiguemisantane.
²Nasanguenataiguëmiro antagaisati
quemisantaiguëri Tosorintsi cara
Corosaqué. Piquemisanquerinta
Quirisito, obirojegui nopiguemisantane.
Nocoguini aiquero ingábintaiguemi
Pabati Tosorintsi aisati iromagoriasére-
tagaiganaquemi cara intimacagaiguëmi
caninasati.

Paboro icarasiatocobintiri Corosasati.

³Pérosati namanocotopiantiri
Tosorintsi iromitocoigumi; aisati
nacarasiatopiantiri Tosorintsi, Iriri
Atingomi Jesoquirisito. Obirojegui
nacarasiatocobintimi. ⁴Tojai
naquemocotaiguëmi cara piquemisanta-
sanotaiguëri Jesoquirisito Atingomi,
aisati pinintasantaiguëri opiguemisanta-
nepague. ⁵Jirai piquemaquero
Nibarintsi Caninaro, aroca pinguemisant-
queri Jesoquirisito, aro iragabisai-
quemi. Aisonori piquemisantobëro.
Yamai pigóiguë iromoncaraquero
Tosorintsi omagaro Irinibare, pigueiri
Atingomi cara iráganëmi canta
Jonogaguítiqué. ⁶Irootisati Nibarintsi
piquemisantaigabaquero obiro, yamai

ojátagueque omagarojeguiquë
matsiguenga. Cara piquemisantobëro
pigóquero aisonori icábintsaiguëmi
Tosorintsi ipasiniatitaiguëmi. Aisa
ocanta iquemisantaigabaquero basiniati
matsiguenga, aisati ipasiniatitaiga-
naque. ⁷Caninasati icomantaiguëmiro
jirai Epájaras. Iroro icantina nibega
naroegui, pérosati icanquineri Quirisito.
Caninasati icanquineri, icomantégotéri
cara nococaqueri naro. ⁸Ipoque,
icomantaigapëna cara piquemisantai-
guëro Isère Tosorintsi pinintasantaiguëri
popiguemisantaneegui.

Yamanocotaiguëri Corosasati Paboro.

⁹Iroro cara naquemocotaiguëmi
piquemisanti, nopalintaigaca
namanocotaiguëmi. Pérosati namaniri
Tosorintsi: “Pomitocoigueri Corosasati.
Pigótacaguiri omagaro pingocagaiguëri.
Pomeri Pisëre ogótacaguiri ati picanta
Obiro aisati pogometasantiri ati
ongantima iraguiataiguëri
Jesoquirisito”. ¹⁰Aisati namanocotai-
guëmi cara iromitocoquemi pintimaiguë
caninasati arota inganinabentaiguëmi
Atingomi, cara pingantaguetineri ora
caninaripague. Aisati namanocotai-
guëmi cara iromitocotimi aiquero
pijátanëtigue pigótasantanëri Tosorintsi.
¹¹Aisati namanocotaiguëmi irosintsitai-
guëmi pingantaguetiro pairorapague-
raca caninari; ingantacaquimiro Irironta
sintsirisonoriguiente aisati caninariso-

nori. Pingantiro antsinisati, quero pitsirisharo, pabetiro ora cométaro, pinganinabentiro.¹² Aisati namanocotopiantéri iromitocotimi pingarasiatiri Pabati Tosorintsi aroquenta tojai icantocobentaigacái. Yoganinaséretáí arota ajátaigue canta imaáiro ora icasijacái. Canta antsibataigapémari antagaisati quemisantatsiri cara pini cataguiterisonori.

**Paboro iquenguitsatocoqueri
Jesoquirisito.**

¹³Jiraini atimabeta cara otsitiniguetasanti, atingomintabetari Satanás aisati igamagaritepague. Yasintabetái Satanás carari yogabisaicotajái Tosorintsi, yamai yasincái Itomi Ira intasanoti. Yamai atingomintasantari Atingomi Jesoquirisito.¹⁴ Icamobicái, ipénabentajáiro ora acantaguetomotiri Tosorintsi, iroro ijocobentaguëtajáiro, yogabisaicotajái. Icábintsasanocái, yamai quero iquengairo Tosorintsi ora acantagueti te organinate.

¹⁵Te iraneingani Tosorintsi, carari ipoque Jesoquirisito Itomi, icantasano-tacari, yoniagacáiri ati icanta Iriri. Jiraisonoriguinte Quirisito obaquenguitsi itimané Irianti, teraíqueraí ine pairoraca.¹⁶ Irilo obetsiquéro omagaro: Jonogaguítetí aísati Jonogaguítetí, quibatsi aísati quibatsisati, iraegui aniaiguë, aísati iraegui te iraneingani, antagaisati. Aro yobetsicaiguë omagaro te iraneingani: ira agátachari, obatacagantsíri, itingomipague, omagaro yobetsiquéro Quirisito. Te irobetsicasitimari, iroonti yobetsicanontaigari Iriati irasintasantimari, irobatasantiri.¹⁷ Irinagaque iné jiraisonori Quirisito ibatasantaguequero omagaropague ora yobetsiquéro. Igáantiro antagaisati, pérosa ocanta; queroca itasongobentiro, omagaro quero pinai.

¹⁸Aquianca eiro aguitoquë. Ora aquianca agáantimaro omagaro ora anganque obacoquë, aguitiquë, obatsaquë, omagaro. Aguito iroonti otingomi obatsa igáantaro omagaro. Aisa icanta Quirisito cantaca iguito antagaisati quemisantatsiri, igáantaigacái Irianti Atingomi. Icamobicái, icaniatanai. Irilo obataiguëri omagaro basini cabiritajachane. Itimaji Irilo, aro itimacagajiri iraegui quemisantiri, igáantiri omagaro Irianti Itingomi antagaisati. Ibatasanotaiguëri,¹⁹ itasorintsitasanoti Irironorintira Tosorintsi. Iroro icocaqueri Iriri, icaninabenqueri Itomi.²⁰ Jirai aguisaigabitari Tosorintsi, ipégatabitari eiro. Aique icamobicái Quirisito cara corosiquë yaparaabiricáiro iraraa. Yogaminaséretacái, aro yamai ágacaninatobaca eiro aísati Tosorintsi. Aísati cara icamaque Quirisito, yobetsiquéro omagaro quibatsisati aísati Jonogaguítetí arota iraniacaninataigabaqueri Tosorintsi.

Paboro iquenguitsatocoqueri Corosasati.

²¹Jirai te pigóigueri Tosorintsi, te pinguengaséretaiguemari, piguisaigabitarí. Iroonti piquengaiguëro ora te ongomeite, picantagueiro.²² Carari imatsiguengatapé Quirisito, icamobitai-güëmi, piquemisantaiguëri, aro yoganinaséretaiguëmi. Yamai Tosorintsi aísati obirojegui págacaninatobaca. Yamai imagoriaséretaigaiguëmi Tosorintsi. Yamai iniacaninataiguëmi aisa ocanta te pingantaguetemate pairoraca quimingaro. Yamai quero iquenguétaimiro ora picantaguetabeca jirai. Ijitaiguëmi iraisati.²³ Carari icocaquemi pérosati aíquero pijátanëtigue pinguemisantasantaiganaqueri. Pérosati piguiaqueri Atingomi irooti cara iripigapaima. Pigóigüe cara

pibiraanaca Irinibare Tosorintsi omagaroguitequë matsiguengapaguequë. Ocomantaguequeri ati ocanta iragabisacotaiguëri Quirisito cara inguemisqueri. Aisa naro nibiraquero Irinibare aisa icanta tojai basini otsatengantiro. Obiro icomantaiguëmi Epájaras. Yamai pigótiri Tosorintsi, pigóiguë yogabisaicoquemi. Quero poperabentaro yamai, quero pomagusantiro.

Paboro yogomequeri ora te ogótingani jirai.

²⁴Tojai itsipiriasanotë Quirisito ora iragabisaicontëmari antagaisati quemisantaiguërine. Yamai aisati nosigari Quirisito, natsipiriorbitaiguëmi cara nanguemisantasantaquamemi, aro nacaninatanë. ²⁵Icanquena Tosorintsi: “Pomitocotaiguéri omagaropiguemisantane; pogometasantaitaiguéri Nanibare”. ²⁶Aro yamai nogometaitaiguë miro ora te ogótingani jirai. Yamai Tosorintsi igótacagaiguëri omagaro quemisantatsiri. ²⁷Icogui Tosorintsi pigóiguero ora icantaiguëmi yamai; iroro caninarosonori nibarintsi. Cagaribi obirojegui jorío, carari coshoni yogasantaitaiguëmi Quirisito, yogüëmiro Isére pasiquë pisére. Yamai pigóiguë obiro irasi, aisati Iriro pasiegui, iráganëmi Jonogaguítatequë pintoimotaitaiguëri pérrosati. ²⁸Nocomantégotaiguëri Quirisito, aisati nogometaitaiguëri matsiguenga: “Pijoquiro ora picantagueti te onganinate, coshoni piguiatiri Quirisito, aiquero pijátanétigue pinguemisantanëri”. Nocogasanti irogótasantiri Atingomi antagaisati nopiguemisantane. ²⁹Iroro nopolomiribirica nacantasanotëneri Quirisito yosintsiténanta itasongobenquinanta.

2 ¹Nocogui pigóigue cara pérrosati nopolomiribintaiguëmi. Tojai

namanocotaiguëmi, nacantopiantiri Tosorintsi iromitocotimi obirojegui Corosasati aisati opiguemisantane cara Iraoriseaquë aisati omagaro basini quemisantatsiri te iraneina.

²Nacantasanotëneri Atingomi arata pinganinaséretanë aisati pinintasantabaguima. Aisati nocogui piséretimari Tosorintsi, aisati cara inomotasantimi ora pigóontimaro ora icocaquemi. Aisati nocogui irogótasantacaguimiri Ira jirai te irogótingani, Irianti Quirisito.

³Igóntasantiro omagaro Iriro, igóntasantaro antagaisati. Aquieroti aquieroti ironijaquemiro cara piguiatanëri.

Pigamemari matobiantatsiri.

⁴Pigamema iromatobiquimica, irinibaantëmilo caninatsaro irinibare. Iroro nocomantégotagüéqueri Quirisito caninarisonoriguiente. ⁵Aintana naro yaca, tesonori nantsibataiguëmi canta, carari tojai naquengaséretégotëmi. Nobesérebiquemari cara caninasati pitimaigui aisati piquemisantasantanëri Quirisito. ⁶¿Teco jirai piséretanacari Atingomi Jesoquirisito, piquemisantqueri? Aroque yogabisaicotajimi. Yamai pérrosati piséretanëmari antagaisati cataguiteri, pinguemisantanëri, coshoni piguiatiri. ⁷Nosiagantëmilo panguirintsi; iroronta opari iaguiro aisati iroro sintsitacaguiro. Aisati picantaro obiro pigüéshoniquimari Quirisito, aro irogótacaquemi aisati irisintsitacaquemi. Pérrosati pinguemisantasantiri, cara yogometaitaiguëmi jirai. Aisati pingantima pérrosati pingarasiatasantaiguéri Tosorintsi aroquenta icábintssasanoigüëmi.

⁸Arotasha pine: quero piquemisantiri ira cogabitacha iromatobitaiguëmi. Iroonti irogometaitaiguëmi omagaro

iquengaséretagueta iriro, aisati ora igótaguetabeca. Iroonti tsoigagantsi, iroonti irogomeantane matsiguenga jirai te irogóigueri Tosorintsi. Ira ogometasitimiro teni iraninte pinguemisantiro ora yogometaiguëmi Quirisito.⁹ Cara imatsiguengatapé Quirisito icampái eiro cara pini obatsa. Aisati itasorintsitasanoti Irironta Tosorintsi. Iroro yoniagaguécái, ati icanta Iriri.¹⁰ Aroquenta poguëshonicari Quirisito, yuguëmiro Isère pasiquë pisére, itasongobentauiguëmi obironta irasi. Irilo Itingomisonori omagaro inaigatsi, ibatasanotaiguëri antagaisati agátachari, obatacagantatsiri, itingomipague, antagaisatipague.

¹¹Yametaiga joríojegui itota ora icantabeca imatsiguenga Abaram. Aisa ocantabeta yamai cara pitoquimame, carari te omitocotimi. Carari yamai ijocaquemiro Quirisito ora picantagueti jirai cagaro caninatatsi. Yamai te ongogue angantaguetoantairo ora te onganinate aroquenta ipasiniatitaigaái Quirisito.¹² Cara pobaotisabiritaigacari, aisa ocanta pitsibatari Jesos cara icamaque itiaca icabiritanaa. Iniaiguëmi Tosorintsi aisa ocanta picamaque obiro, pitiaca, picabiritanaa. Obironta irasi Quirisito te pingantaguetoantairo te ongomeite cantaca jirai; aisa ocanta picamobiquero ora quimingaro. Cara icaniatanai Quirisito, aisa ocanta picaniatanai aisati. Yamai pinasitaigaa, piquenguirinta Tosorintsi Ira tinaajiri Quirisito.¹³ Jirai cantaigaquibi picamaqueni te pinguengaigueri Tosorintsi, tenta pinguemisantaigueri, teatisati pitotima, carari picantaguetaigabitaro pairoraca te ongomeite. Yamai icábintsaiguëmi Tosorintsi cara popabacari Quirisito, itimacagajimi cara aisa ocanta itimacagajiri Itomi, ijocajimiro picantaguetro quimingari.

Yamai te pinintaigue pingantaguetajiro pigóiguënta pintiomoqueri Tosorintsi Jonogaguítetqué.¹⁴ Jirai opomiribintabitaro isanguenare Moisés abisaicoontimarrone, carari te omoncaratiro eiro. Pigótacagaigacái ainiro acantagueti ajáqueme Sharincabeniquë. Iroro cantënguicha icamobitaigaái Quirisito cara corosiquë, ora yogabisacoontaái. Imoncaratobicáiro isanguenare Moisés. Yamai quero opomiribintaaro.¹⁵ Cara icamaque Quirisito icabiritanaa, yagobiaiguëri omagaro agátachari aisati obatacagantatsiri irianti camagaripague. Igótacagaigacái cara quero inintacaguiri camagari yagobiaái; imetocabintacái Quirisito.

Quero piquenguero yogometaguetabemí matsiguenga.

¹⁶Te organinate cara inguisabiritimiro matsiguenga ora papi aisati ora póga. Aiti cataguiteripague imoncaratiro jorío, aisati ora imagorianta aisati cara irishongapaima manchacori irirai aisati osarini. Icogabeca pingantaiguero irootisati icanque iriro. Quero pomoncaratiro obiro, quero piquemisan-tiri cara inguisabiritimiro.¹⁷ Jirai tojai yametaiga jorío, iquengantari Tosorintsi. Carari yamai aroco yareca Quirisito. Irianti Irirosonori, Itingomi antagaisati. Moncaraca yamai. Quero ogatsitairo ora yametaigabitara jorío.¹⁸ Pigamema. Quero pinintacaguiri yamatobitimi. Jemita iritsoenguimica. Ingantaiguëmi: “Pingantina nibega naro. Teni nongomeite. Intsome antingomintimari irisaanganetsite Tosorintsi, aro iragabisaicocái. Yoniaguëna, naniaqueri ira te iraneingani. ¿Piniaqueri obiro?” Aro yoguibatabitaca. Quero piquemisan-tiri. Itsoigani.¹⁹ Te inguengueri Ira obatasanotacái, Atingomi Jesoquirisito. Te iraninte irogótiri. Carari eiro

aquengasëretari Quirisito, igótacagana-cái, imitococái, coshoni ogobaga, acantasantineri Tosorintsi ora icocacái.

²⁰Icamaque Quirisito. Yamai iniaiguëmi Tosorintsi aisa picanta pitsibatari Quirisito cara corosiquë. Iniaiguëmi aisa picanta picamaque obiro aisati. ²¹Yamai pairo pitsipiriorbitarico picantasitabecaro ora icanquemi matsiguengapague queronta pogabisaicotimi? ²²¿Teco ingantasitimaro matsiguenga cara yogometasitaiguëmiro negaca? Pinetse ²³Teco asi oguiro opapinintaiguero operi? Aroca opéro, aroque: te ongantématrio asére. Aroca irititëma matsiguenga, ijitabeca igóti, ijitabeca iquemisantasano, ijitabeca te irobatima, ijitabeca icantasantineri Tosorintsi. Carari itsipiriasita cara itica. Cara irititima, përosati ingoguiro ingantaguetro cagaro caninatatsi, aisati përosati yoguibata.

“Caninasati pintimaigue”, icanque Paboro.

3 ¹Jirai te pigóigueri Tosorintsi, aiquero pijátaiguëme Sharincabeniquë. Carari ipoche Quirisito icamobitai-güëmi, icaniatanai, iáque jonoquë isobigopë ibacosonoriquë Tosorintsi. Piquemisanqueri, yogabisaicoquemi; aroquenta itimaaji Iriro, itimacagajimi obiro aisati. Yamai quero piáti Sharincabeniquë, pijáigüé aiquero jonoquë. Pingogasantiro pinganque ora icogui Atingomi aisati pingantaiguemari ibega Iriro. ²Pinguengasëretima atiraca pingantima canta Jonogaguitequë; quero piquengasëretapinintiro atiraca picanta yaca quibatsica. ³Cara piquemisanqueri aisa popabacari

Quirisito Ira camobiquimi, aisa ocanta picamobiquero obiro ora pameta jirai te ongomeite. Yamai quero piquengairo ora inatsi yaca quibatsica, quero picantaja pibega jirai. Yoganiasëretai-gaimi Tosorintsi, aro pintsibatanëmari pintoimotaiguëri Jonogaguitequë.

⁴Aiquenta iripigapaima Quirisito yaca quibatsica, Ira aganiataáí. Iragáantapéro omagaro, aisati pintsibataiguëmari obiro aisati pinganquimari ibega Iriro.

“Quero pogatsitairo ora picantagueta beca jirai te organinate”.

⁵Yamai obirojegui irasi Quirisito, picamobiquero quimingari. Aro quero pogatsitairo ora picantagueta beca jirai te organinate. Sérari, quero pintiro tsinane cagaro pijina. Tsinane, quero pintiri cagari pijime. Quero pomaguimpianti. Quero pinebetaro tsinanepague; quero pinebetari séraripague. Quero pinebetaguetaro ora yasintagueta. Ora pinebetaguetara, picantacacaro pitosorintsie; cagari Tosorintsi, irianti pobabane. ⁶Tojai ocapague icantagueti matsiguengajegui te inguemisantiri Tosorintsi. Irolo inguisaguëquimari Tosorintsi yamai aisati caraquenta. ⁷Jirai picantagueta be taro obirojegui, pasi poguero. ⁸Yamai pijocaigairo omagaro cantacha nega: quero piguiséntobaga, quero pitsimajengatobaga omanapague, quero picatsimanijintobaga, quero picabegobaga, quero pinibati quimingari. ⁹Quero pamatobitobaga. ¹⁰¿Teco yamai pomasinatitajima? Quero pogatsitairo ora picantaigabita jirai. Carari ipasiniatitasantëmi Tosorintsi, aisati yamai aiquero iraganinataigana-quemi Tosorintsi, irogótacaquemiro ora iquianca Iriro. Aisati aiquero pingantaiganaquimari ibega Iriro cara yobetsicanëmi jirai. ¹¹Teni inguenguero

Tosorintsi atiraca acantaiga: jemita eiroca jorío, teca jemita; aroca otota, teca jemita. Te inguenguero atiraca opaniaca, pairoraca igóiguë eiro. Jemita obimantagaca, jemita teca imimantétai. Iroonti iquierque aquemisantirica Quirisito.

Ati icantaiga quemisantatsiri.

¹²Pinetse, icoigaiguëmi Tosorintsi iraisati. Inintasantaiguëmi aisati icogui piganinatasanotanëma. Icoaqueumi pasi poguiro pingábintsante aisati pingantaneintégotante. Quero poguibata, quero pipégatsatari matsiguenga ira quisëmine, pinibatiri caninasati, antsínasati pingantiri.

¹³Pomitocotobaguima. Quero pipégatari ira cantëmi ora te organinate, carari pingábintseri. Pijocajineri, quero piquengairo ora icanquemi, aisa ocanta ijocajimiro Atingomi ora picantaguetomoqueri quero iquengaimiro.

Pingantimari ibega Iroro. ¹⁴Panibati yamai: pinintasanotobaganëma antagaisati quemisantatsiri. Aroca pinintobaganëma, aro pinguengaséreto-baguima, aíquero piganinatasanotanëma, aíquero pingantaiguëmarí Atingomi. ¹⁵Nocogui pinganinabentiri Quirisito Irironta paniro Atingomi. Pigóiguë icoigaiguëmi pinguengaséretiri Iroro aisati pomagoriaséretaigue aisati coshoni pogobaguima. Aisati icogui pérrosati pingarasiatopiantaiguéri Tosorintsi. ¹⁶Pérrosati pinguengaséretiro ora yogomeque Quirisito. Cara igótacaquemi, aro pogometobaganëma caninasati, piganinaséretobaganëma.

Pingántataigueneri Tosorintsi Irinibare, pingántabentiri, pingántatégotiri cara icábintasantaiguëminta Quirisito aitosati pingarasiáséretiri Tosorintsi. ¹⁷Te ongogaigue iripasiguitaigái Atingomi Jesos. Aro pairoraca pinibati,

pinibatiro arota inganinatanë Iroro. Pairoraca pinganque, pingantineri Iroro. Icogui irisintsiséretimi piganinatiro omagaro ora pinganque. Aisati pingarasiatiri Pabati Tosorintsi.

Ati angantiri omatsiguenga.

¹⁸Tsinane, pinguemisantiri pijime. Iroro icocaquemi Atingomi. ¹⁹Sérari, pinintasantiro pijina, quero piguisaneintiro. ²⁰Janequi, pinguemisantiri asintaiguimi, pairoraca inganquemi iroronta organinatiri Atingomi. ²¹Aintaca pitomipague, quero piguisasitagueteri arota quero itsirissimi. ²²Obiroca ibimantaga, pinguemisantasantiri ira mananquemi, pairoraca inganquemi. Quero pamatobitiri; queroca inetsimi, caninasati pingantineri, quero poperata. Aroca pitingomintari Atingomi, aro pisintsibentineri pobatorote ira pintine. ²³Pairoraca pinganquineri, pisintsibentineri aisa onganquima pisintsibenquineri Atingomi, cagari paniro pobatorote.

²⁴Aroque pigóiguë pairoraca pinganquineri Atingomi Jeso quirisito, aíquenta imëmiro caninaro, iraganinataiguëmi canta Jonogaguítiquënta, ingantocabentaiguëmi. ²⁵Irianti ira cantapinintiro te organinate, iratsipiriaque aintanta ira casitígaterine, jemita ibimantaga, aisati jemita ibatorote.

Pérosati pomanocotiri Tosorintsi.

4 ¹Aintaca matsiguenga pomanantane, caninasati pinebetsiquiri, pingábintseri. Nogótacaquimi aintasati Pitingomi cara Jonogaguítiquë, igóque antagaisati picantagueti. ²Pérosa pingantaiguema pomanocotaigapinintiri Tosorintsi, pomanocotima obiatí, pomanocotiri pomatsiguenga. Aisati pingarasiatopian-tiri Tosorintsi icábintsaiguëminta.

³Pigóiguë cara yomianquina aroquenta nocomantaguequeri matsiguengajegui atiraca ongantima iragabisacoqueri Quirisito. Yamai nocogui pomanocotina naroegui aitosati, arota iromitocotina Tosorintsi nanguenguitsatocoqueri Atingomi yaca iromingamentoquë.

⁴Pomanocotina arota notsatenguineri nongomantégotiri Quirisito catingasati arota inguemasantobëro matsiguenga. ⁵Aisati obirojegui, cara pitsibataigari ira te inguemisante, pintime caninasati, aro iraniaquemi, irogóiguë caninari Atingomi. Aisati caninasati

pogometaguetiri, quero poperataro.

⁶Cara pinibataguequeri, pingábintseri. Quero paseriguiri. Aroca irosomiquimi pairoraca, caninasati potabitiri ingogantanëma iriro inguemisante.

Isanguenatocoqueri Tíquico.

⁷Yamai nagátaiguëmiri Tíquico, opiguemisantane. Icanquineri Atingomi omagaro ipéri inganquineri. Imitocoquena cara naquenguitsatocoqueri Atingomi. Ingomantaigapëmi ati nacanta naro yaca. ⁸Iroro nagábiriqueru, ingomantégotaigapëna, aisati iraganinataigapëmi obirojegui.

⁹Intsibatanëmari pomatsiguenga ira Onésimo. Nanintasantiri. Iriatisati iriro opiguemisantane, icanquineri Atingomi pairoraca icogui. Aro ingaraque pite comantapëmine omagaro nacantaiguë yaca.

Ibetsataigacari Corosasati.

¹⁰Aintasati natsibatacari yaca yomianqueri Arisítárico, ibetsataiguëmi. Aisati ibetsataiguëmi Maricos, ira ireintitsari Berinabé. Aroque

piquemocoqueri Maricos; aroca irarequimi, págaçaninatobëri caninasati.

¹¹Aintasati yaca Jesos, aitosati ijita Jósito, ibetsataiguëmi. Icaegui maba irianti jorío, icarataiguina cara nocomantaguetiri matsiguenga ati ocanta irágantane Tosorintsi. Tojai yoganinasëretaiguëna. ¹²Aisati ibetsataiguëmi Epájaras pomatsiguenga. Icanquineri Quirisito antagaisati ora icocaqueri. Tojai yamanocotaiguimi iromitocotimi Tosorintsi, irisintsisëretimi pingantaigueneri omagaro ora icogui Irilo. ¹³Nocomantégotéri Epájaras: aisonori tojai ipomiribintai-guimi obiro, aisati ipomiribintaiguëri ira Iraoriseasati aisati ira Iyeráporisati. ¹⁴Aisati ibetsataiguëmi Ircas jompiantsirsí, ira nanintasantí. Aisati Témás ibetsataiguëmi.

¹⁵Nobetsataigari omagaro opiguemisantane cara Iraoriseaquë; aisati nobetsataro ora Nimpas aisati antagaisati quemisantatsirsí ira bototaigacha cara obangoquë. ¹⁶Oca nasanguenareca pinibataigueneri omagaro quemisantatsirsí obirojeguiquë. Aique pigaganëro cara Iraoriseasatiquë quemisantatsí; irinibataigabaquero iriro aisati. Aiti basini sanguenari ora imagantëmi iriro; pinibatobëro obirojegui. ¹⁷Pingantiri Ariquipo: “Pingantasantiro ora ipëmi pingantineri Atingomi”.

¹⁸Yamai oca nasanguenatica naati nobetsatanquemiro. Aintana naro yaca. Quero popeicotina cara yomianquina yaca cara iromingamentoquë. Nocogui ingábintsaiguemi Tosorintsi.

Aro ocarati ora nasanguenataiguëmi. Paboro